



գործ թիվ ՀԿԴ/0242/02/23

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՀԱԿԱԿՈՌՈՒՊՑԻՈՆ ԴԱՏԱՐԱՆ Ո Ր Ո Շ ՈՒ Մ

Երրորդ անձ ներգրավելու մասին

«15» մարտի 2024թ.

ք. Երևան

ՀՀ հակակոռուպցիոն դատարանի դատավոր Կ.Բադալյանս՝ քննարկելով թիվ ՀԿԴ/0242/02/23 հակակոռուպցիոն քաղաքացիական գործով երրորդ անձ ներգրավելու մասին պատասխանող Ա.Հակոբյանի ներկայացուցիչ Վ.Գրիգորյանի և հայցվոր ՀՀ գլխավոր դատախազության ապօրինի ծագում ունեցող գույքի բռնագանձման գործերով վարչության՝ ի դեմս դատախազ Հ.Հարությունյանի, միջնորդությունները.

Պ Ա Ր Զ Ե Ց Ի

ՀՀ գլխավոր դատախազության ապօրինի ծագում ունեցող գույքի բռնագանձման գործերով վարչությունը հայցադիմում է ներկայացրել ՀՀ հակակոռուպցիոն դատարան ընդդեմ Արշակ Սարգսի Հակոբյանի, Անահիտ Ռաֆայելի Մկրտչյանի, Արմինե Արշակի Հակոբյանի, Սարգիս Արշակի Հակոբյանի, Անահիտ Վարազդատի Աբրահամյանի, Կարեն Սարգսի Հակոբյանի, Նառա Գրենիկի Պետրոսյանի, Քրիստինե Արշակի Հակոբյանի, Դավիթ Միերի Համբարձումյանի՝ ապօրինի ծագում ունեցող գույքի բռնագանձման պահանջի մասին:

Հայցադիմումը կից փաստաթղթերով դատավորի աշխատակազմին է հանձնվել 06/12/2023 թվականին և Դատարանի 06/12/2023 թվականի որոշմամբ հայցադիմումն ընդունվել է վարույթ:

Դատարանի 22/12/2023 թվականի որոշմամբ նշանակվել է նախնական դատական նիստ 2024 թվականի փետրվարի 08-ին:

14/03/2024 թվականի դատական նիստում պատասխանող Ա.Հակոբյանի ներկայացուցիչ Վ.Գրիգորյանը ներկայացրել է գրավոր միջնորդություն՝ վեճի առարկայի նկատմամբ ինքնուրույն պահանջներ չներկայացնող երրորդ անձ ներգրավելու վերաբերյալ հայտնելով հետևյալը.

Ի թիվս այլ պահանջների՝ իրավասու մարմինը սույն գործով ներկայացրել է «Ուրբանիզմ-Պետրոլ» ՍՊԸ-ում Արշակ Սարգսի Հակոբյանին և Անահիտ Ռաֆայելի Մկրտչյանին պատկանող 50% բաժնեմասերը բռնագանձելու պահանջ:

Իրավասու մարմնի կողմից ներակայցված հայցի բավարարման դեպքում Պատասխանողների՝ «Ուրբանիզմ-Պետրոլ» ՍՊԸ-ում ունեցած բաժնեմասերն ամբողջությամբ բռնագանձվելու են հոգուտ Հայաստանի Հանրապետության, Պատասխանողների և «Ուրբանիզմ-Պետրոլ» ՍՊԸ-ի միջև դադարելու են բաժնեմասերի սեփականատեր լինելու փաստացի բխող կորպորատիվ իրավունքները և պարտականությունները, ՀՀ-ի և «Ուրբանիզմ-Պետրոլ» ՍՊԸ-ի միջև ծագելու են բաժնեմասերի սեփականատեր լինելու փաստից բխող կորպորատիվ իրավունքները և պարտականությունները, փոփոխվելու է «Ուրբանիզմ-Պետրոլ» ՍՊԸ-ի մասնակիցների կազմը: Արշակ Հակոբյանը, Անահիտ Մկրտչյանը և Սարգիս Հակոբյանը դուրս են գալու «Ուրբանիզմ-Պետրոլ» ՍՊԸ-ի մասնակիցների կազմից. նրանց փոխարեն «Ուրբանիզմ-Պետրոլ» ՍՊԸ-ի մասնակից է դառնալու Հայաստանի Հանրապետությունը:

Պնդում ենք, որ հայցի բավարարման դեպքում, դատարանի կողմից կայացվելիք վճիռը ազդելու է և՛ Հայցվորի և՛ Պատասխանողների հանդեպ «Ուրբանիզմ-Պետրոլ» ՍՊԸ-ի ունեցած իրավունքների և պարտականությունների ծավալի վրա («ընկերություն-մասնակից» կորպորատիվ իրավահարաբերությունների և դրանցից բխող փոխադարձ իրավունքների և պարտականությունների համատեքստում):

Հաշվի առնելով վերոգրյալը՝ խնդրում են սույն հակակոռուպցիոն քաղաքացիական գործի քննությանը, որպես վեճի առարկայի նկատմամբ ինքնուրույն պահանջներ չներկայացնող երրորդ անձ ներգրավվել «Ուրբանիզմ-Պետրոլ» ՍՊԸ-ին (ՀՀ, ք.Երևան, Գայի պող., 1/1, բն. 74):

Նույն դատական նիստում հայցվորը հայտնեց, որ չի առարկում երրորդ անձ ներգրավելու միջնորդության դեմ և ներկայացրեց բանավոր միջնորդություն՝ վեճի առարկայի նկատմամբ ինքնուրույն պահանջներ չներկայացնող երրորդ անձ ներգրավվել նաև «Սարգիս և քույրեր» ՍՊԸ-ին, «Օվսաս» ՍՊԸ-ին, «Մոգո» ՈՒՎԿ ՍՊԸ-ին, «ԻՎՈՔ» ՍՊԸ-ին:

Հայցվորը և պատասխանողների ներկայացուցիչներ, փաստաբաններ Վ.Գրիգորյանը, Ս.Իսոյանը, Տ.Ղազարյանը, Լ.Սարգսյանը առարկություններ չներկայացրեցին միջնորդությունների վերաբերյալ:

Քննելով միջնորդությունները և ուսումնասիրելով քաղաքացիական գործի նյութերը, Դատարանը հանգում է հետևյալին.

ՀՀ քաղաքացիական դատավարության օրենսգրքի 38 հոդվածի 1-ին մասի համաձայն՝ վեճի առարկայի նկատմամբ ինքնուրույն պահանջներ չներկայացնող երրորդ անձինք կարող են գործի մեջ մտնել հայցվորի կամ պատասխանողի կողմում մինչև դատաքննության ավարտը, իսկ սույն օրենսգրքի 41-րդ և 42-րդ գլուխներով նախատեսված կարգով քննվող գործերով՝ մինչև եզրափակիչ դատական ակտի հրապարակումը, եթե գործով կայացվող վճիռը կարող է ազդել կողմերից մեկի հանդեպ նրանց ունեցած իրավունքների կամ պարտականությունների վրա կամ կարող է հանգեցնել նման իրավունքների և պարտականությունների ծագմանը:

Նույն հոդվածի 2-րդ մասի համաձայն՝ վեճի առարկայի նկատմամբ ինքնուրույն պահանջներ չներկայացնող երրորդ անձինք կարող են ներգրավվել գործին իրենց միջնորդության հիման վրա:

Օրենսգրքի 38 հոդվածի 5-րդ մասի համաձայն վեճի առարկայի նկատմամբ ինքնուրույն պահանջներ չներկայացնող երրորդ անձին գործին ներգրավելու կամ ներգրավելու դիմումը մերժելու մասին առաջին ատյանի դատարանը կայացնում է որոշում՝ առանձին դատական ակտի ձևով:

Տվյալ դեպքում, քանի որ քաղաքացիական գործով վեճի առարկան ներառում է նաև նշված ընկերություններում մասնակցության բռնագանձման պահանջ, ուստի Դատարանը գտնում է, որ թիվ ՀԿԴ/0242/02/23 քաղաքացիական գործով կայացվող վճիռը կարող է ազդել «Ուրբանիզմ-Պետրոլ» ՍՊ ընկերության (ՀՎՀՀ՝ 02557441), «Սարգիս և քույրեր» ՍՊ ընկերության (ՀՎՀՀ՝ 00442546), «Օվսաս» ՍՊ ընկերության (ՀՎՀՀ՝ 02521833) իրավունքների և պարտականությունների վրա:

Բացի այդ, հայցի առարկան ներառում է նաև Երևան քաղաքի Դավիթ Բեկի փողոցի թիվ 17/8, Երևան քաղաքի Դավիթ Բեկի փողոցի թիվ 71/9, Երևան, Կենտրոն Հանրապետության փողոց 51, 53 շենք, 45 տարածք հասցեների անշարժ գույքերի բռնագանձման պահանջ այն դեպքում, այդ գույքերից առաջին երկուսը վարձակալությամբ հանձնված են «Մոգո» ՈՒՎԿ ՍՊ ընկերությանը, իսկ վերջինը՝ «ԻՎՈՔ» ՍՊ ընկերությանը (ՀՎՀՀ՝ 00127892), ինչը նշանակում է, որ գործով կայացվող վճիռը կարող է ազդել կողմերից մեկի հանդեպ նրանց ունեցած իրավունքների կամ պարտականությունների վրա:

Ամփոփելով, Դատարանն եզրահանգում է, որ միջնորդությունները հիմնավոր են և ենթակա են բավարարման:

Ելնելով վերոգրյալից և ղեկավարվելով ՀՀ քաղաքացիական դատավարության օրենսգրքի 38,199-200-րդ հոդվածներով.

Ո Ր Ո Շ Ե Ց Ի

Միջնորդությունները բավարարել:

Թիվ ՀԿԴ/0242/02/23 հակակոռուպցիոն քաղաքացիական գործով պատասխանողի կողմում որպես վեճի առարկայի նկատմամբ ինքնուրույն պահանջներ չներկայացնող երրորդ անձ ներգրավել՝

1. «Ուրբանիզմ-Պետրոլ» ՍՊ ընկերությանը (ՀՎՀՀ՝ 02557441),
2. «Սարգիս և քույրեր» ՍՊ ընկերությանը (ՀՎՀՀ՝ 00442546),
3. «Օվսաս» ՍՊ ընկերությանը (ՀՎՀՀ՝ 02521833),
4. «Մոզո» ՈՒՎԿ ՍՊ ընկերությանը (ՀՎՀՀ՝ 02662506),
5. «ԻՎՈԲ» ՍՊ ընկերությանը (ՀՎՀՀ՝ 00127892):

Նշանակել ևս մեկ նախնական դատական նիստ 25/04/2024 թվականին, ժամը 09:30-ին՝ ՀՀ հակակոռուպցիոն դատարանում (հասցե՝ ք.Երևան, Թբիլիսյան խճուղի 3/9, դահլիճ 8):

Որոշումն ուժի մեջ է կայացման պահից և ենթակա չէ բողոքարկման:

ԴԱՏԱՎՈՐ



Կ. ԲԱԴԱԼՅԱՆ